

# OMUKWETU

No. 22

Registered at the GPO as a Newspaper

12c

## ELOK, ita dhimbwa oshinakugwanithwa she - Omumbisofi a ti

"Ongeleka ngele tayi yelutha iikaha yi taambe omakwatho taga zi kookuume, itayi shi ningi ya dhimbwa po oshinakugwanithwa shayo shokukwatha yalwe, yo itayi shi ningi nokugandja ombili kutya yo nayi kale ashike omunaluhepo ta taamba.

"Otatulalakanene Ongeleka yetu yi kale wo yi na oshikaha shokugandja kuyalwe naanaa ngaashi wo oitaali yalwe taye shi ningi muuyuni", osho omumbisofi Dr. Kleopas Dumeni a lombwele Omukwetu mokugaluka kwe kombanda yomafuta omasiku ngaka.

Metalelopo lye lyiiwike 6 muuyuni wopondje, oshikando shotango sho a yapulilwa moshilonga muJuni 1979, omumbisofi okwa kala moshigongi oshinene shokomitiye shaayehe shOngeleka onkwaevangeli paLuther yomuSweden. (Swedish National Committee of LWF)

Okomitiye ndjika otayi longo mekwathano nOngongahangano yAakwaluther muuyuni (LWF).

Pahokololo lye oshigongi osha kundathana unene oluhepo lwoontauki ngaashi dhomuCambodia, Asia nomuAfrika moka mwa kwatelelwa wo oontauki adhihe dhomuumbugantu waAfrika.

Kakele kaambika, oshilonga shetumo noshoto tuu iilonga iikwawo oya kundathanwa wo.

"Aantu otaa pulakene nohokwe shono twe shi pumbwa noya hala shili okukwatha, ihe onde ya lombwela wo kutya: Tse inatu hala tu kale ashike aataambi naagalikanenwi, aawe. Osho wo oshinakugwanithwa shetu tu kale noshikaha shokugandja kuyalwe noku ya galikanena moothina", osho omuwilikingeleka a tumbula.

Oshigongi osha li sha kaliwa kaawilikingeleka, kaatonateli yiitayingeleka nokawiliki yomahangano gi ili nogi ili ge na ombepo yokukwatha mboka taa hupu nuudhigu.

"Moshigongi shoka onda gandja ekundo lya ELOK nolyoongeleka oonkwawo muNamibia. Mombepo yoshigongi onda dhimbulula kutya omuntu gwaKalunga oha nyengwa nani okumwena manga mukwawo e li moluhepo," osho a ti.

Mpaka omumbisofi oku na momadhiladhilo omakwatho omanene mOngeleka yetu ge tu zile koshilongo shoka ngaashi: omatungo gEnongelo lyaayakuligongalo mEngela, Etungululo lyOshinyanyangidho, omatungo gOsikola yOngeleka kOshigambo, omaqumbo gaapangi noondohotola mOnandjokwe nosho tuu.

Omumbisofi ina dhimbwa wo shono hashi ningwa notashi ningwa natango kiilongo iikwawo, koongeleka nokomahanganotumo omolwongeleka yetu nenge omolwoshigwana. Ayihe mbika okwe yi hokolola nesimaneko enene.

Aakuluntu naa tameke okuhungilitha nokungongo sheka aanona, ngaashi naanaa yo ya li haye shi ningilwa kookuku nokootatekulu, opo oondunge ndhoka natse wo tu ke dhi longithe mokwiikwatha nomokukwatha omaluvalo getu noshigwana shokomeho — Kiyala

Ehokololo tala kep. 5



KAAsweden, tate Dumeni okwe shi hokolola nepandulo enene kushono ye shi ningila oshigwana shetu meni notaye shi ningile Aanamibia mboka ya halakana nuuyuni.

"Mpoka pu na ompumbwe, otatu yelutha shili iikaha yetu tu taambe nepandulo, ihe tse otatu kala tu uvite wo aluhe ongunga yokukwatha yalwe", osho omuwilikingeleka gwa ELOK a yelithile Omukwetu.

Tala kep. 2

# Oshinakugwani- thwa sha ELOK

Dha za kep. 1

Tate Dumeni, nonando a popya oshindji kombinga yehalo lyaantu muuyuni oku-kwatha Aanamibia, ina holola mpaka ngele okwa thigi a ninga eindilo lyasha omolwongeleka.

## Ilyongeleka yopondje

Metalelopo lye okwa holola wo kutya okwa kala e na oshimpwiyu niilyo yOngengeleka pondje yoshilongo nkene yi na okulandulwa pamauthompango, gOngengeleka.

"Shika osho sha kala hashi ningwa kaa-wiliki ya tetekele noshi li pamauthompango," osho a tumbula nokukandula po omalimbililo.

Yamwe mboka e ya tsakanene nokwa yi nayo moonkundathana, omumbisofi okwa ti kutya okwa lesa mo muyo uukwatya mbuka:

a) Aantu mbaka kaye shi aahepului, ihe kaye shi wo aanaluhepo omolwomakwatho gookuume muuyuni.

b) Omidhi dheitaalo lyomuKalunga muyo natango odhi na omwenyo sho taa kumike Ongengeleka yawo omukumo kutya: "Mboka yomuJesus, ondhikwa yawo ihayi tokoka omakwi, nomo moka ya hala okukala.

c) Moshitsa shika shahugunina, omumbisofi mwene okwe shi tula osho onomola yotango, okwa koneke oluhepo lwaanashilonga yopambepo mokati kawo.

Moluhepo lwopambepo omwa kwatelelwa unene aasita, aayevangeliste, Oombimbeli, Omaimbilo, omambo omakwawo guukriste, iifo naatalelipo.

Nkene ompumbwe ndjika yopambepo tayi vulu okukandulwa po, omumbisofi okwa yamukula Omukwetu kutya ehokololo alihe ote li fala mEpangelongeleka nolyo tali ka dhiladhila omathaneko.

Ihe tate Dumeni ota pandula unene kushono tashi ningwa po kaakwathi yomokati kawo yene naashono tashi ningwa koongeleka dhomiilongo moka oontauki dhi li mo.

Poompito odhindji metalelopo lye ndyoka lya dhingoloka konyala niilongo yi vule 7, mwa kwatelelwa wo Afrika, okwa kala pamwe nomupresidende gwOraata yOngengeleka muNamibia (CCN), omumbisofi James Kauluma.

"Inatu tsakanena niilyo ayiheyiye yOngengeleka mbyoka yi li pondje, ihe oshe tu nyanyudha sho twa mono mboka twa mono. Oye shi yelitha kutya oya yuulukwa aayakuli yopambepo, omambo naatalelipo," osho omumbisofi Dumeni a hulitha ehokololo lye. Okwa gwedha ko kashona:

Ekundo lyawo olyo ndika: "Aantu nOngengeleka ngele taye tu etha, tse otu li mondhikwa yaJesus ihaayi tokoka omakwi. Ongengeleka nayi tsikile ano okugalikanena iilyo mbika"



Meme Aino Dumeni

## IITSA YA SIMANA MONKALAMWENYO YOMWIILONGI

Onda tseya nonda nongele kutya monkalamwenyo yomwiilongi omu na iinima oyindji ya simana, ihe mwaambino onda hala owala ndi popye mo itatu mbyoka ndi wete ya simana noonkondo. Oyo: **Uukalunga; Eilongo; Onakuyiwa.**

### UUKALUNGA

Oshinima shotango ndi na okutseya ongomwiilongi omukriste, nandi tile Kalunga. Ashihe shandje nashi wilikwe kuYe. Oonkondo oonene ndhoka dhi vule ayihe oye omugandji gwadho. Ongula nongulohi andola nandi kambadhale okulonga ehalo lyaTate yomegulu, oshoka ohaku tiwa:

"Behold to obey is better than sacrifice ..... and obedience is easy when you know you are being guided by God who never makes mistakes." Shono sha simana, Omuwa oye omutoye, onkee natu shi tseyeni atuheni aailongi.

### EILONGO

Okwiilonga oshinima shandje / shoye mwene. Oshivanawa unene noonkondo ngele tandi tseya kutya onda ila shike mosikola, okwiilonga nenge pamwe okweendagula owala? Tseni atuheni aailongi andola natu koneke ondilo noshiholekwa oshinene shi li mokwiileshela omambo gi ili nogi ili. Oshivanawa ngele tseni atuheni aailongi tatu nongele kutya omulongi ina gwanena nando ompumbwe dhuunongo womwiilongi. Omwiilongi oye oshigwana, noshigwana otashi pumbwa oshindji momwiilongi - Okulesha otaku pendula oshindji.

R. D. Namwandi

# Meme Dumeni natango muEuropa

Efelo lyomumbisofi, meme Aino Dumeni, ina galukila manga kuNamibia konima yetalelopo lyawo lyiiwike 6 kombanda yomafuta. Etalelopo olya li lyopambelewa.

Omumbisofi okwa li a taamba ehiyo kOngengeleka Onkwaevaangeli paLuther muSweden omolwoshigongi sha li ko. Mokuwa ko okwe ende pamwe nameme Aino ngoka kwa li wo u uka kOsoomi pahiyoyaa kiintu yaahwiyaka.

Manga etalelopo lyawo ayehe yaali inaali hula po, Okangundulongekidhi pOmbelewangeleka oki indile Ehanganotumo lyaSoomi li monefe meme Aino okersesa yoomwedhi dhimwe omolwelaka lyOshii-ngilisa.

Eindilo ndika olya taambwa nehala olya monika muBirmingham, Selly Oak, England, moka mwa putudhilwa aanashilonga oyendji yOngengeleka ndjika momalaka nomiinima yilwe wo.

Pahokololo ndyoka lye etelelwa kutate Dumeni, meme okwe mu thigi monkalo ombwanawa lela kombinga yuukolele nota tsikile ootundi dhe nombili.

Ngele oshe ende ngaashi sha pulandwa, ota ka galukila mpaka petameko lyomumvo tagu ya

## Aakuluntu, inamu ethela omeya mondunda, lesheni

Oshigwana kehe opo shi putuke momikalo dhasho dhehumokomeho, nomuntu kehe kaaha mone omikundu odhindji monkalamwenyo ye, oku na okuyanuna omambo niifo yomaludhi gi ili nogi ili mbyoka ta mono.

Aagundjuka otaa sheke aakuluntu kutya oya kulupa nokulesha, shika hasho. Aakuluntu, inamu ethela omeya mondunda, lesheni. "Omafuma omape, kage vule omakulu okuzima."

a) Mokulesha otatu ngambeke omahalo nomaiuvo getu omawinayi.

b) Otatu vululukitha omadhiladhilo getu nosho wo omalutu getu uuna twa vulithwa kiilonga nenge komalweendo gontumba.

Kombinga yaanasikola otaa mono ontseyo yelongo netekulo lyopanshitwe. To mono iiholelwa oyindji, ngaashi okupitha aantu miiituthi nomiigongi nomikalo dhokukala naantu.

Omunasikola oti ilongo wo omalaka mokulesha iinyolwa yi ili noyi ili. Osho wo ompango dhago. Uuyamba owindji u li mokulesha, itoo u mana.

Ambrosius Nantinda

# Eyooloko pokati keshasho nekoleko

*Inatu itavela mekoleko mu na eenghono da sha-dopasakramendi. Ihali weda ko sha kEsakramendi leshasho, osheshi ola wana kulo vene. Inandi itavela mOmhepo lyapuki hai yandjwa kekoleko, osheshi oya yandjwa nale mEshasho.*

Inandi itavela kutya omunhu ina kolekwa ota ka kana. Ashike onda itavela kutya ola pumbiwa opo tu udeko exupifo letu. Mekoleko kamu na sha tashi kondjifa Ombibeli ile eitavelo.

## Ekoleko la longifwa nai

Osho sha yela osho ngaho kutya ekoleko ola longifwa yo mepuko. Oto hange o-maudaneko oo haa ningwa mekoleko oo a ningwa oshitwa shopokati moukriste, omanga eshasho la undulilwa konima.

# Osho tashi imbi ovanashilonga komolongelokalunga

**Pakutala kwange pefimbo lopaife ovanashilonga ove na oiimbi ihapu oyo tai va imbi okukala peendjovo daKalunga. Ngeenge handi tameke oku i tumbula apa, onda itavela kutya itandi i mane, osho yo itandi dulo oku i tumbula kwaai inene fiyo okwaai ishona. Onghehe pitikileni nge ashike ndi tumbule ei handi dimbulukwa.**

1. Ovanashilonga kave na **efimbo**. Osheshi omafiku aeshe ove li molongonga nomOshoondaxa otava fiki mo va loloka. Oilonga imwe ohai longwa fiyo omOshoondaxa.

Kuvamwe kape na nokuli eyooloko pokati kOshoondaxa nomafiku ongaho. Onghehe kave na **efimbo**.

2. **Oinano ile**. Ope na ovanashilonga vamwe ve li kokule neenhele dokuongalwa, nove na oudjuu okwoongala pefimbo nokushuna pefimbo komaumbo.
3. Oukwatya wopashitopolwa (situation).
4. Oilonga ihapu oi na oinakuwanifwa ya pitilila efimbo lomunashilonga.
5. Ova mangwa kounima vamwe vanini ve na eenghono doku va tula moupika. Ngaashi odjuulufi, nohokwe yokukala poivilo, pomaudano nokuya

Eyooloko pokati keshasho otali hangika apa kutya mEshasho omunhu ota ningwa omona waKalunga, manga mekoleko ta hongwa okudiinina a kale omona waKalunga.

Omunhu e lishashifa mwene peedula da konda 15, ina wana vali okukolekwa, naau te shi ningi, ota longifa eshasho mepuko. Ekoleko olaava ashike ve lishashifa mouhanana. Ekoleko halo tali ningi omunhu omukwaneongalo ndelene ota ningwa keshasho.

Osha pumbiwa kutya Ongeleka keshe i kale nomukalo wonhumba omo opanyasha tava fikama komesho yeongalo notava hepaulula eitavelo lavo.

## Exupifo

Eyooloko pokati kEshasho nekoleko, Eshasho Esakramendi la dikwa kuJesus mwene nohali ningilwa omunhu keshe omukulunhu nokaana. Ekoleko olo ekoleko leshasho, kwaavo va shashelwa peke, ndele kali fi Esakramendi.

Inatu ekelashi eshasho, fye hatu fimaneke ashike ekoleko. Ndele natango otu na okutwikila nekoleko, opo tu kale noilyo i na omwenyo mOngeleka. (Exulifo)

## Munyika Veikko

komaweenda anafangwa mOyoondaxa manga ovanhu ve li momalongelokalunga.

Oku na natango outomhelo vamwe vana-fangwa veludi olo. Pamwe oidjalomwa ile eliwapaleko lomitwe. Pakushiiva kwange kape na sha shimwe osho tashi imbi ovanashilonga okukala peendjovo daKalunga shihe fi oinima tai shikula apa:

- a) Ounye
- b) Oupika
- c) Oudimbwanhu

Oku na shili ovanashilonga ovo hava longo nomOshoondaxa nande haalushe. Ovanhu va tya ngaha efimbo olo itava mono okwoongala. Eshi kashi fi etomhelo kuvo.

Eendjovo daKalunga kadi li kOngeleka ndele nee odi li mOmbibeli. Ngeenge tave di lileshele voovene otava mono nghene sha pumbiwa okwoongala pudo noitava ka kala nande mongudu yaava va pulifa epulo eli.

Kwaavo hava fuda po moyOondaxa shashi ova longa oule woshivike ashishe, ova dimbwa elongekido-ifano lOmwene tali ti: "Ileni kwaame ava hamu longo, ame nohandi mu pe etulumuko."

Otava tameke oshivike oshipe neloloko lavo shashi kapu na ou e va tulumukifa. Osho tava ende ngaha va loloka fiyo tava fi ounye notava ende tava shuna monima. Didilika oinima itatu oyo hai tu dile melongelokalunga:

## EGALIKANO LYOMUKWEYI

*Mokwiigidha kwandje uwa ndje,  
Kalunga kuuyuwiki wandje, ino ya kokule.  
Sa ndje ohenda ngu uve egalikano lyandje,  
Ongame ndu uka muule womeya.  
Nefundja tali ninginitha ndje,  
Onda vulwa kokukuga kwandje.  
Omuligu gwandje gwa zindi,  
Omeho gandje ga loloka okuligamena  
kungoye  
Oyendji ye vule omafufu gokomutse  
gwandje,  
Oombo haa tondo ndje owala  
oyendji mbo ya hala okuyona ndje po,  
Oye tonde ndje ngay ndaa noondjo.  
Omolwoye handi humbata ondhino  
Esheko lya siikile oshipala shandje.  
Okushekwa kwandje ou ku lwete,  
Okusithwa ohoni nokutukwa kwandje u  
ku shi;  
Aathiminiki yandje ayehe u ya shi.  
Oombo taa popyagana ndje,  
Nomuunkolwi haa imbagana ndje.  
Ngame otandi ku galikana, Omuwa,  
Omolwesilohenda lyoye olindji.  
Hupitha ndje ndaa ningine menono,  
Hupitha ndje maatondi yandje.  
Hupitha ndje muule womeya,  
Efundja lya ninginithe ndje.  
Nuule waa ninagule ndje  
Nosheelo shaa iyedhile komeho gandje  
Amen.*

F. Shikwambi



1. Ehepaululo lomatimba
2. Etumwalaka lOmwene (Evaengeli)
3. Enangekonoupuna

Katu dulo okutwikila oilonga tuhe na eenghono.

Oku na ongudu inene yovanashilonga oyo ihai ongala shoshili. Omo mu na ovanashilonga vakulu naava vape. Novalihongi vetu ovakriste ava ve li mehanganano naava vehe mo eshi tava ka ya molongonga omo tava ka kala mongudu ya tya ngaha.

Tala kep. 6

# Aakriste mu ELOK, omakundo geni ga zi kOkapa

Omulongi gwetu mOshinyanyangidho, meme Rauna Leevi, pomathimbo nomathimbo okwa kala ha yi ku S. Afrika kiipangelo omoluunkundi we. Mpaka okwe tu etele tse aaleshi yOmukwetu omakundo ga zi kaamwameme mboka ya tetekelele hoka nale omimvo dha piti. Ote shi hokolola ngeyi:

Ongeleka Onkwaevaangeli paLuther yOwambokavango, oya kala yi na oshimpwiyu omolwaamati yetu ya kala mehalakano. Aasita naayevangeliste oya tuminwe ko okuza muTsumeb sigo okOlivingi (kuUnion).

Oku na mboka ye li mehalakano muKaapstad, oye mu kundu. Aamati mbano ngashingeyi otaa longo oshilonga shuudiakoni mokati kaavu mboka haa tumwa hwiya koshikandjo shuukalinawa.

Olyomakaya kehe otaa ende niipangelo iinene nooHostela, taa pula ngele pu na ngoka a zi kuSuidwes-Afrika. Kutya Omuwambo, Omuhherero nenge omushike, kehe tuu.

Aamati mbaka otaa yakulitha omaliko gawo okuzaleka nokupalutha omalutu ngaashi unene aavu yamwe otaa zi owala moofalama noongaku dhokoompadhi ke na.

Nima gwaandjetu onkene a ya nale, otaye ya uunake? Ngiika olyo epulo lyoye.

Oye mu yuulukwa unene notaa pula: Tante oko tuu e li natango e na omwenyo?



Omuhongwafita Daniel Hamukwaya koPaulinum

Itaa pula we ngele Okashana ka ningi ekango lyosuuka. Gumwe gwawo omukuluntu gwegongalo, David Uusiku, okwa tembuka ko negumbo lye, oku li ngashingeyi pOngwediva.

Oshilonga she okwe shi thigile yakwawo aakriste, nando egongalo lyawo oli li ngaa kokule kashona. Omusita omutumwa a zi kuKimberly, E.S.Kutu, oha talele po aavu Aakwaluther, ote mu kundu unene. Ota tumbula:

Onda fa ndi li muNamibia, oshoka ote yakula aavu mbaka inaa shashwa nokutopola wo Omasakramendi Omayapuki. Eti 5.8.1979 melongelokalunga omwa shashwa Omuwambo Kautekwa Moombola, a zile kUuhongo, mUukwanyama.

Nando katu uvitathane momalaka, ukalipamwe ohau nyanyudha noonkondo. Haavu ayeke haa talelwa po kaamati mbaka, naamwameme wo kuRobben-Island. Elongelokalunga ohali kala ewanawa.

Omusita gwOmbaatili, naye wo ote mu kundu noti indile aakriste muNamibia ya galikanene Ontuntu yaRobben. Naa imbe omahambeledondjimbo, pamwe tayi eguluka, oshoka oku na omihoko odhindji nodhi na omitenge omidhigu.

Aamati yomehalakano mOkapa, (Kaapstad), otaa lesa pamwe natse oshifo shOmukwetu. Oyendji otaa yematele yakwawo mboka ihaa gongala poohapu dhaKa-

## Ehongo louteologi muVELKSWA

Outeku mouteologi, owa fa wa mona paise omidi momadiladilo avahapu moshilongo eshi. Eshi osha konekiwa komaindilo a fika kEpangelongeleka okumononwa omhito moshinima eshi.

Omaindilo 43, mokati kavo ovakainhu 6 novaevangeliste 2, okwa holokele poshi-taafula shEpangelongeleka laKotoba 1979, okumona oolyelye tava pewa omhito okulihonga outeologi.

Ovaindili 18 muhee na omukainhu, ova pewa omanyamukulo ngaashi kwa li va teeela.

Payelifilo lahamushanga wEpangelongeleka, ofikola youfita yaVELKSWA, otai teeke ashike Ongeleka keshe (ELK na ELOK), i tume ovahongwa 15 omolwomudo tau ya 1980.

Moshikando eshi, inaku tambulwa manga omukainhu pamatomhelo mahapu, nalimwe linene pafatululo lahamushanga wOngeleka, movaindili kamwa li mu na edjapo da pumbiwa.

lunga. Otaa pumbwa omambo melaka lyawo.

Otaa pandula komumbisofi Kleopas Dumeni sho a pitikile omambo gOshiwambo puyo.

Lwahugunina ote tumbula omuyakuli T. Kalenga, ngoka ha yakula omusita oha longo neitulomo enene noshihauto she opo tu thike melongelokalunga nenge oku tu shuna komagumbo. Ooyakwawo E. Shingenge, na S. Sheepo, otaa longo shili. Kalunga ne ya yambeke. Otaye mu kundu unene.

Rauna Leevi



Meme Rauna Leevi

## Elongo lyOshiluudhe lye ekelwahi muNamibia

Osikola yokombanda yedhina Martin Luther, mOkombahe, oye ekelehi elongo lyOshiluudhe ngaashi lya longekidhilwa oosikola adhihe muNamibia kepangelo lya S. Afrika.

Peha lyelongo ndika, osikola ndjiyaka oya landula omusindalongo gwsikola yokombanda muLondon.

Ekonakono lyotangotango pamusindalongo omupe, oye li nyola nuumvo, moka aalongwa 9 yomaanyoli 13, ya piti niitsa iiwanawa lela.

Ethimbo alihe lya piti, osikola ndjika yopaumwene yOngeleka onkwaevangeli paLuther, mUushimba (ELK), oya kala hayi yematele omusindalongo gwOshimbantu.

Mu S. Afrika, aanona omathele ogendji, oya dhipagwa omimvo dha piti sho nayo wo ya li taa holola okuuva nayi kwawo omolwelongo lya yoololelwa owala Aaluudhe.

# Iha hwanga ndjele nokaana?

EPULO 8 lya pulwa aanona molupe lwoonku-ndathana lya holoka mOmukwetu No.21 gwo 15 Novemba 1979 olya etele ndje omaipulo ogendji nda kalele nago mokuputuka. Gamwe ga mono ngaa omayamukulo, ihe gamwe oga pumbwa owala aakuluntu yo yene ya gandje uuyele nomatmpelo gawo.

## Omahini nekaka

Oshinima shokutindila aanona okulya onyama osha hepeke omadhiladhilo gandje pamwe naanona ooyakwetu pethimbo lyetu nopethimbo ndika wo. Tango nda tala sha fa oshishona, kashi na oshilonga unene ihe konima yokutalulula oshinima shika onda koneke omausama gamwe kombinga yaakuluntu yetu aaholike.

Omolwashike haa tindile aanona onyama noku ya thiga kaaye na we ompito yilwe kakele kokulya omahini nenge ekaka? Oya tala mbela kutya onyama oyo nuuleke yi yone po ukolele womunona, nda dhini kutumbula omayego ge?

Ngele ohaye shi ningi netompelo ndyoka, nena otaa ningi shili nawa, oshoka otaa tonatele ukolele womalutu goyana notashi halitha ndje ndi geele okanona kehe hoka taka lili ka hala ka pewe onyama yo tayi yono po ukolele wako.

Ihe ngele aakuluntu ohaye shi ningi nehala lyokutyapula mwene, manga uunona tau si po komahini notaa yeya kokazimba okatoyetoye kokanyama, kaye na etegameno lyoku ka matha (pewa) nonando naa galikane Jesus kuume kawo, nena aakuluntu oye na ondjo koshipala shaanona noshakalunga wo.

## Elongo nomuthigululwakalo

Muukalinawa momanongelo moka aakuluntu ye tu tula aana otaa longwa ya kale haa li oomwaha nomaulalelo ga kwatelela mo ikulya yomahudhi agehe mbyoka yi na iitungitha opo ya

# Eenghundafana dovadali molwounona

Ovadali vomeumbo limwe tava ti: Ounona vambuletu otava i kOshoondaxa, shaashi otwe va landela eeshuta dipe.

Vamwe: Vambuletu otava ka imba mO-ngeleki, osheshi ove lilongekidila omudo wavo.

Vakwao natango: Vetu otwe va tuma va ka wapaleke Ongeleka, osheshi oilonga oyavo neudo.

Osho nee ovadali va kundafana komudo wounona, voo tave lipula osho shi na na okuningwa.

Ope li nee ngaha: Ouhamba waKalunga owaava ve li ngounona, mbela etumbulo eli, itali wapalele nduno hano ovakulunhu yo? Osheshi otu shi shi:

- Ounona ihava shoolola
- Ounona kave na mutima mule
- Olwisho lounona inali ya kokule
- Ounona ovawanifi veudaneko, ovo oonakuyandja oshihopaenenwa shiwa.

Omuleshi mukweni

gamene omalutu gawo komikithi tadhi wulu okuyona po omalutu gawo inaaga kola manga nawa.

Yo ikulya mbyoka yi tunge wo omalutu gawo ge li methimbo lyokukoka natango. Ngame ngele omukuluntu okwe ya pungame ta lili okanona ke ka si komukithi, ihe ondi shi shi shili kutya okwa li he ka panga onyama aniwa omolwomuthigululwakalo, ye ta hala ndi lile pamwe naye, ngame ote fadhuka po ashike.

Otandi ke mu galukila konima opo ndi mai pe epukululo lyandje kutya moompito dhokweetela okanona eso omu na yimwe yokwaagandja ikulya ya pumbiwa meputudho lyokanona.

## Omukanka nomatpumomumwe

Omukuluntu ngo e hole shili okamwana noku na ohalo okamwana ka kale monakuyiwa yu-ndjolowele nenge a hala ka pite nawa moskola ko ka pandule kaake shi ku shi hokolola nkene he nenge yina a kala te ka tonatele, na gandje wo ikulya mbyo iwanawa komwana.

Aakuluntu oyendji ngiika ya tondokele nale ketompelo lyomuthigululwakalo, kutya aanona osho ye na okukala itaa li onyama paakuluntu.

Ngame otandi ya yamukula nomuthindo te ti: Tse ongaagundjuka otwa tala kutya omithigululwakalo ndhoka tadhi landulwa pwaa na omatompele ga ndjanga notaga tungu, otatu dhi ekelehi kokule. Otwa tala otadhi koionyeke okuza meni, hakombanda ngashi ukoloni wulwe mboka tatu lamanana nawo moshilongo shetu pethimbo ndika.

Kutya nee omuthigululwakalo nenge osha shilwe nashi yele owala kutya ethimbo lyokuzimina iinima nopwaa na omapulo nando omalimbililo opo ge li, olya za mo "mode"

Ishewe eyelitho lyiinima ya fa mbika olyo ashike tali ka fila omukanka ngoka gu li pokati kaanona naakuluntu yethimbo lyetu. Mokundopa oku shi ninga otashi nenepeke owala omukanka nomatpumomumwe pokati k oongundu ndhika mbali nda zi nokutumbula.

## Ehiyo netegameno

Sho te popi ngeyi, ite popi owala ndu ukilila nonda tala oshinima shoka shonyama ihe ote YEMATELE iinima wo yilwe oyindji ya fa shika mbyoka aakuluntu ye yi shi yo yene itaa pumbwa oku yi lombwelwa kutse aanona naagundjuka notwa tegelela owala yi opalekwe.

Ote ningi wo chiyo lya sheywa paha nolyaagundjuka aakwetu, kutya tse kombinga yetu otwi ilongekidha wo okwoopaleka omapuko getu, uuna aakuluntu taye tu lombwele.

Aakuluntu naa tameke okuhungilitha nokungongosheka aanona ngashi yo ya li haye shi ningilwa kookuku nootatekulu, opo oondunge

Ombinga inene mekandule po lomukifi moshwana okulongikidila ounona eendja da wapala. DIDILIKA: ounona ve fike peemiliyona 500 mounyuni otava fi komikifi domhumbwe yoi-kulya. Tu shi kondjifeni.



ndhoka tse tu ke dhi longithe wo mokwiikwatha nokukwatha omalulvalo getu noshigwana shokomeho.

Yagundjuka. ise natu tegeleleni nombili eyamukulo lyetu kaakuluntu, tse tu tsikileni nokuvulika kuyo nokukondjela emanguluko nuuthemba womuntu kehe opo moku shi ninga twaa thige emanya lya londa kombanda yekwawo.

Ishewe aanona otaa nyenyeta kutya yo kaye shi kutya omolwashike aakuluntu inaa ninga po sha showina shoka tashi tompele shili aanona yawo kutya omumvo nguka ogwawo paigwana (international).

Aanona naa yambekelwe omumvo gwawo.

Penda Kiyalah

## Aayi komambo 10 noshilanduli ko shawo

Aayi komambo 10 gumwe okwa mono ku na omutenya, e ta kala megumbo, nena oya kala po owala 9.

\* Aayi komambo 9 gumwe a dhimbwa oongombe dhe megumbo nokwa tokola e ke dhi piithe mo. Pwa kala 8.

\* Aayi komambo 8, gumwe okwa tokola a pakele po manga oyana. Opwa kala owala 7.

\* Aayi komambo 7, gumwe okwa dhimbwa okupata ositola ye. Pwa kala owala 6.

\* Aayi komambo 6, gumwe okuwete onguwo ye ya ponda unene, e ta tokola oku ke yi lundulula. Pwa kala 5.

\* Aayi komambo 5, gumwe okwa mono kOngeleka kokule. Pwa kala owala 4.

\* Aayi komambo 4, gumwe okwa dhimbwa lukwa kee shi okwiimba. Opwa kala owala yaali.

\* Aayi komambo 2, oya yi moonkunda-thana, ihe itaa tsu kumwe. Gumwe okwa yi nomukwawo okwa thigala po.

\* Omuyi komambo 1, okwa galikana Kalunga ke. Omwiidhidhimiki nguka omolwegalikano okwa mono mukwawo noya galikana pamwe.

■ Aagalikani 2, oya galikana noonkondo Kalunga kawo, noya mono aagalikani ooyakwawo 2.

■ Aagalikani 4, oya hambelele Kalunga noonkondo e taa mono yakwawo 4.

■ Aagalikani 8, oya pandula sho ya ningi oyendji, e taa mono aagalikani ooyakwawo 8.

■ Aagalikani 16, oya nyanyukwa noku ligola pombanda, e taa gwedhelwa po aagalikani ooyakwawo 16.

■ Aagalikani 32, oya kwatwa kohole, kuupenda, komukumo nokuulaadhi e taa mono aagalikani oyendjiyendji sigo okii-longo niilongo.

Omuleshi



## A YI KEVULULUKO LYAANA YAKALUNGA

Omusamane Petrus Nakasole, Onaanda mUukwambi, Omuwa Kalunga okwe mu zimbula mosikola ye yuuwehame konyala omimvo odhindji eti 15.9.1979 moshipangelo shaShikuku.

Tatekulu Nakasole okwa li tango omulogngisikola pliiwiyongo, mUukwambi, opo a tembudhilwa ishewe a ka longe osikola pokati kUukwambi nOngandjera omimvo 1941. Hoka okwa longo oyendji okulesha noyi ishashitha.

Okwa li wo omuuvithi ependa. Kalunga e mu zimbula a ka vululukwe kiilonga ye.

Omwana  
Justina Nakasole

### DIDILIKA

1. Nge ihatu lesa ile ihatu pwilikine eendjovo daKalunga, ohatu dimbwa kutya eendjovo daKalunga oshike.
  2. Ohatu dimbwa omaudaneko oo twa pewa mudo.
  3. Ohatu puka ndele hatu kana.
  4. Ohatu wile meemhango ndele hatu twalwa moupika fiyo alushe.
- a) Eendjovo daKalunga odo ondjila noshili nomwenyo.
  - b) Ou te di diinine fiyo ohauuuninwa ota ka pewa okulya komuti womwenyo.
  - c) Ou ita itavele eendjovo daKalunga ota tokolelwa mekano laalushe.

ONGHE HANO OVANASHILONGA OVAHOLIKE TU DJALENI OMUKUMO NOUPENDA NOUFULE WOKULESHA EENDJOVO DAKALUNGA. ODO DI KALE DI YADI MUFYE NOUPUNA WADO.



## Oshike tashi imbi ovanashilonga va kale peendjovo daKalunga

Da dja kep. 3

Nande kashi fi ehalo lange ile loye, ongudu ei i na omuwiliki ou e li opresidende a kula kanyamukulwa. E na eendunge nomayeke, noupenda okwoongelela ongudu yaye oilyo opo i kale ehanganano la kula. Omo omu na ovanhu aveshe ovo tave linyenge va fa va mangeluka. Nonande ovapika va idilako.

Ongudu yovatangalali, ovasheki novahongauli vovakriste. Ovo peendjovo daKalunga have u yapo omalupita opo va hongauli ovakriste pamikalo domaludi mahapu. Neudifo kuvo tashi ti "ovakelefiti ihava xulifa". Ngomunhu oto ti ohava longifa efimbo ndele otashi dulika a kale ponhele imwe ajike oule wefiku alishe a kalala ile ta popi oindjovo ihafele.

Ndele ta popi ooNanghali yokeulu ye ta fiye edina laye, ile ta dipo ehe li shii naye mwene, kutya oye lyelye.

Okufatulula oukwatya wongudu ya tyangaha itaku pu, efalo ashike nde mu tela ovanashilonga vaholike. Mu didilike kutya moilonga mu li mo mongudu ine-

ne yovanashilonga vakweni, oovo va mwene yo efilonghenda lokupewa edidiliko liyapuki moshipala nohonhulo manga va li ouhanana ngaashi nyee.

Ndele eshi va kula va ninga novanashilonga nokuli tava dimbwa ondombwedi yavo oyo ve na oku ka ulikila Omuxupifi wavo.

Ova diinine ashike omadina avo aa va lukilwe fiku olo. Onde li neekela paife keshe umwe e li apa ota dimbulukwa omunashilonga e li mongudu ya tya ngaho, shoo itashi tu pe ombili. Oshipopiwa eshi tashi pula ngeenge ohatu pulukulufana tuu onde lineekela otashi tu tomho.

Ngeenge ohatu nyengwa okupukulula ovamwameme ava inatu fya oonye oku va twala koshipala shaKalunga, oko ihaku li kondwa sha. Oko ku na eenghono adishe neendunge adishe.

Fye vene natu didilikenj osho tashi tu dile mokuhalesha ile okukala peendjovo daKalunga.

## MuGeneva omwa li eenghundafana

Oilongo itano yaUninginino kumwe noilongo i li oushiinda naSuid-Afrika osho yo SWAPO, na S. Afrika ye mwene, okwa li va ongala omafiku a dja ko muGeneva okutalulula eenghundafana edi kwa li da pwiinina di na sha nemanguluko laNamibia.

Moshikando eshi, eenghundafana okwa li da pamba unene komafaneko mape a ningwa po mwa kwatelelwa omalinyengo ovakwaita va SWAPO, va Suid-Afrika ile va VVO pefimbo lepangelo lopokafimbo.

Konima yoshivike shimwe eshi eenghundafana da ningwa fiyo kefiku eli twa nyanyangida oshipopiwa eshi, inaku udika sha kombinga ya S. Afrika ou kwa teeelwa a tinde ile a itavele efaneko olo lipe (Li lesa mepandja eli.)

Omukoneki umwe moimima yopolotika, okwa ti kutya ye ita teelele ko sha tashi di ngeno moshongalele osho. Ye omukalelipo wa SWAPO kOiwana ya hangana ta ti kutya ehepeko lefimbo.

Oshongalele osha kala omafiku ane aeke.

### OMULUMENTU TA PUMBIWA MOSHINYANYANGIDHO

Oshinyanyangidho otashi pumbwa omulumentu e na omaukwatya taga landula:

a) E shi Elaka lyoomeme nohe li nyola nawa, na kale wo hu uvu ko omalaka galwe, unene Oshiingilisa.

b) E na ohokwe yokulesha omambo niinyolwa yilwe.

c) E na ehalo lyokwiihumitha komeho miilonga ye.

d) Kwi ilongekidha okutameka iilonga petameko lyomumvo 1980.

Ngoka a tala ota vulu noku na ehalo, na tume eindilo lye komuwiliki gwOshinyanyangidho manga 15 Januari 1980 inaali pita.

Otashi vulika wo a dhenge ongodhi konomola Ondangwa 41 a kundathane nOmuwiliki gwOshinyanyangidho nenge a holo-ke ye mwene.

Etelela wo oonzapo noombapila dhoye dhomaukwatya.

## Iitsa yomosheetwapo shongashingeyi

Endangalati mondjila yaSuid-Afrika, okutaamba omathaneko gilongo itano yUuninginino, noku ga tula miilonga, otashi vulika lya kokololwa po kethaneko ndika epe lyanakusa Dr. Agostinho Neto, gwaAngola.

Osheetwapo shika oshe etitha omwenyo moonkundathana ndhoka dha li dha si pokati kiilongo itano; Amerika, Engilanda, Fulanisa, Ndowishiland lyokuuninginino naCanada yo na S. Afrika muFebuluali 1979.

Pauyelele mboka wa thiki mOmbelewa yOmukwetu, osheetwapo shika oshipe osha humbatela mo iitsa tayi landula:

■ Pu ningwe ehala moka kaamu na okukala aakwiita (Demilitarized Zone) pokati kaNamibia, Angola, Zambia naBotswana lyuunene wookilometa 50 koombinga adhihe dhoongamba pokati kaNamibia niilongo mbyoka ya tumbulwa.

Ehala lya tya ngaaka otali tameke okulonga muule womasiku 14 euvathano lyetulo-lyomatati sho lya shainwa.

■ Ookamba dhaSWAPO miilongo yopuushiinda dhi tonatelwe komapangelo giilongo mbyoka moka dhi li, pethimbo ndyoka lyopokati okuza ketulopo lyomatati sigo epangelo epe, ndyoka tali ka hogololwa lya tameke iilonga yalyo.

■ Muule womasiku 14 okuza peshaino lyeuvathano lyetulo-lyomatati, aakwiita yaSWAPO ya kale ya koshoka mo meni lyehala ndyoka lyaa na kukala aakwiita, yo ya shune kuAngola nokuZambia.

Iilyo yaSWAPO mbyoka ya hala mehogololo, yi tule po omatati yo yi galukile kuNamibia taa pitile miyelo yu uthwa mewiliko lyomapangelo giilongo moka ye li mo.

■ Omapangelo gaAngola naZambia, otaga si oshimpwiyu ga tonatele pwaa kale nando iilyo yaSWAPO tayi humbata ondjembo pethimbo ndyoka lyopokati netonatelwe ndika otali tsikilwa nalyo sigo oshiwike shimwe sho eyamukulo lyaashoka sha zi mehogololo lya tseyithwa.

■ Ekwatathano lyu ukilila otali dhikwa pokati komapangelo giilongo yopuushiinda noombelewa dhawina dhetangawateli lyaVVO miilongo yopuushinda sigo oombelewa yOmukalelipo gwOwina gwa-

Amushanga-Ndjayi gwa VVO mOvenduka.

Omapangelo gopuushiinda otaga tseyitha kehe ethimbo koombelewa ndhika iilonga yetonatelwe lyawo nkene tayi ende.

■ Kombinga yaNamibia, aakwiita ya S. Afrika otaa kala mookamba mpoka dha tulwa nomuule wiiwike 12, otaa kala ya koshoka mo muNamibia. Ookamba otadhi kala metonatelwe lyaUNTAG, (etanga lyaVVO lyokukwathela metsakanitho lyomathaneko ngaka), ngoka tu utha omainyengo gawo gopevi nogomombepo.

■ Aapolosi yoongundu ndhoka dhi na sha noshinima oyo ayeke taa thigala mehala ndyoka lyaa na kukala aakwiita notaa humithakomeho elongelokumwe naUNTAG.

■ SWAPO ita ka kala e na ookamba dhaakwiita ye meni lyaNamibia.

■ Mpoka euvathano lyombili tali yonwa, UNTAG ota konakona mbala oshinima nokukutha onkatu tayi etitha po einkelelo neyo komeho lyomathaneko ngaka. Ngele osha ningwa miilongo yopuushiinda, mbalambala omapangelo giilongo mbyoka otaga tseyithilwa oshinima shoka.

■ Miilongo yopuushiinda, UNTAG ota pekapeka oongamba ta thindikilwa kaapolosi nenge kaanambelewa yomiilongo mbyoka, MuNamibia ota thindikilwa kaapolosi ya S. Afrika nenge kaanambelwa ye.

■ Epekapeko otali vulu wo okuningwa pwaa na ekwatho lyaathindikili ya tya ngaaka. Epekapeko lyomombepo itali thindikilwa komuntu.

### ILANDELA OMUKWETU 1980

Ino hala u kundane mOngeleka nomuuyuni? Udhitha ano okafooloma hoka pevi.

Teta mpaka \_\_\_\_\_

EDHINA: .....

ONDJUKITHI .....

Onda tula mo oor.....

## TEACHERS WANTED

Council of Churches in Namibia,  
P.O. Box 41, Windhoek 9100,  
invites applications for  
ENGLISH TEACHERS FOR ADULTS

Applicants must be fluent English speakers but need not have previous experience.

Applicants prepared to teach outside of Windhoek will be preferred.

Duties will include:

- Teaching classes every evening during the week (preparation will be needed every afternoon).
- Attending quarterly seminars on teaching methods.

Applicants should make themselves available for an interview in Windhoek during November to December, 1979.

All successful applicants will have to attend a four week training course during January 1980 and will thereafter be employed. All trainees will be paid R150 for attending the course. Trainees who do not complete the course satisfactorily will not be employed after its completion.

**Salary: R175** basic with sliding scale depending on qualifications and experience. **Three months trial period February-April, 1980.**

Apply by letter or telephone:

The Educational Co-ordinator, Churches English Language Project, P.O. Box 41, Windhoek 9100.  
Tel: Windhoek 37510

OMUDO WOUNONA

Etwikilo

8. Ounona nava ye kenongelo  
Vadali amushe shi udeni  
Vaha ninge ovapindi vomalodu  
Eendoloma inava undulifwa  
Oukalata neengoma nava efe.
9. Oomeme nootate tekuleni  
Ounona mondjila yukifeni  
KOMushiti wavo va twaleni  
Nava shiive ekulilo nexupifo  
Omwenyo waalushe va kondjele..
10. Ounona nava kelelwe kowii  
Vadali amushe shi ningeni  
Nava amenwe koikolwifa nomakaya  
Ounona kave fi veni vene  
Omwe va pewa mu ke va pulwe.
11. Ovapangeli amushe fikameni  
Oufemba wokanona kondjeleni  
Omatungo eefikola tanekeni  
Ounona momahongo findileni  
Meekamba nomomaumbo va kufeni.
12. Ovahongifikola konekeni  
Onakwiwa younona omeke leni  
Va hongeni inamu va fiila  
Ounona inamu va lumbula  
Va kwafeni inamu va efela.
13. Ovahakuli ounona hakuleni  
Ounghundi wopalutu keleleni  
Oshilonga shohole wanifeni  
Ounona ohole nava mone  
Moku va kuma nomoku va venda.
14. Ounona amushe lungameni  
Omapukululo mawa shikuleni  
Kovakulunhu aveshe dulikeni  
Oshipango oshitine wanifeni  
Elao nomwenyo mule likoleni.
15. Omahongo mofikola diinineni  
Oilonga yofikola wanifeni  
Kovahongi veni dulikeni  
Omakonakono aeshe ka piteni  
Onakwiwa yoshiwana wapekeni.  
A. L. Nghifiku  
(Molwomudo wokanona 1979)

OMUKWETU

Oye oshifo shOngeleka Onkwaevangeli paLuther yomOwambokavango.  
Oha nyanyangidhwa mOshinyanyangidho shOngeleka mOniipa.  
Omukuluntu gwoshifo omumbisofi dr. Leonard Auala.  
Ondando yOmukwetu komumvo muAfrika R 2-60, kombanda yomafuta R 5-00.  
Omambesitelo pamwe noondando naga tumwe kOmukwetu Ontiipa, P/B. 2013  
Ondangwa 9270

OWAMBOKAVANGO CHURCH PRESS  
ONIPA P/BAG 2013 ONDANGWA 9270

# Lishangifa diva Omukwetu